

## SPRM kaji semula prosedur kawalan penjara

**Putrajaya:** Suruhanjaya Pencegahan Rasuah Malaysia (SPRM) akan meneliti semula sistem dan prosedur kawalan di penjara bagi mencegah rasuah di kalangan kakitangan serta banduan.

SPRM akan berbincang dengan pihak polis dan Jabatan Penjara dalam masa terdekat bagi melihat sistem pembanteras rasuah sedia ada dan merumuskan penambahbaikan yang perlu diselaras.

Pengarah Siasatan SPRM, Datuk Mustafar Ali, berkata pihaknya akan mengambil tindakan proaktif bagi memastikan 'tembok kebal' itu tidak menjadi sarang rasuah terutama membatikan dadah.

"Sistem sedia ada mungkin sudah baik tetapi masih boleh ditambah baik. Kita akan bekerjasama dengan pihak polis dan penjara untuk meneliti semula sistem serta prosedur ini selain melihat bagaimana ruang untuk rasuah boleh ditutup.

"Selain itu, kita juga berharap adanya pemberi maklumat di kalangan kakitangan penjara supaya jenayah ini dapat ditangani segera," katanya kepada BH ketika dihubungi semalam.

Beliau mengulas pendedahan akhbar ini mengenai penyeludupan dan pengedaran dadah termasuk barang larangan lain dalam penjara dengan bantuan warden serta polis yang diberi upah.

Warden dan polis terbabit dikatakan menerima komisen 30 hingga 50 peratus bagi setiap barang yang dijual manakala banduan mengetahui sindiket itu pula mampu meraih sehingga RM20,000 sebulan.

Mustafar berkata, sebanyak enam tangkapan dilakukan SPRM membabitkan kakitangan penjara dipercayai terbabit rasuah antara 2009 hingga Mei 2012.

Beliau berkata, empat kes membabitkan warden penjara termasuk membekalkan dadah, meminta khidmat seks daripada isteri banduan dan dua tuntutan palsu.

Selain itu, katanya, dua kes adalah berkaitan pembebasan awal banduan membabitkan seorang koperal dan pegawai penjara.



“*Sistem sedia ada mungkin sudah baik tetapi masih boleh ditambah baik. Kita akan bekerjasama dengan pihak polis dan penjara untuk meneliti semula sistem serta prosedur ini selain melihat bagaimana ruang untuk rasuah boleh ditutup*”

**Mustafar Ali,**  
Pengarah Siasatan  
SPRM